

Die Hauptsach it nit annerscht worn, bäschtimmt niet!
Wäßt, seit a poor Tooch mark i nämli, wie mei Bua ou mein elektrisch
Rasierer rümprowiert.
I marks und marks a niet.
Söller prowier! Välleicht gälingts na besser wie mir, ohna Fräla und
ohna Booder, hoffentli.

Willy R. Reichert

Weinspruch

Eh Tropfm Schwääß –
Zäha Tropfm Wei
Sou sogn die alta Leut, –
In Wengert seid racht lusti fei
Und trinkt ner fest
Und schwitzt ner glei
Und schpätzt in euer Hend fest nei
Und schafft euch richti hääß,
Däß euer Haufm Schwääß
An Haufm Schöppli geit!

Juniwind

Wenn mer ner wisset,
wu er harkummt,
dar Ziecheuner!

Brengt an Gschmack mit,
als wenn scho Ahrn wär
und a nu Frühajahr.

Gestern it mersch gwast,
als hätt er in Träuwlschtouck
der Mäus
wos vo weithar derzehlt.

Gall, schöa its bei uns,
Windla,
sünst wärscht
scho lang widder fort!

Kann mersch ja denk,
däb dersch gfelt,
wennst in der Wengert
nachn Rachtn siechst,
der Blumma
üwer dia Blüetn fährt
und der Mädli
nei der Haar.

Naja,
mer könna di brauch,
däbt an Raachng brengst, –
ower nit zuviel! –
die Gewitter wachschäbst
und alsemal mit ehn redst
wenn mer kee Ouschprach hat.

Mer söllet halt wiss,
wu da harkummst,
du Ziecheuner!